



Udruženje/udruga "BH novinari", Kralja Tvrtka 5/5, 71000
Sarajevo Telefoni: 033 223 818, 033 217 302
E-mail: bhnovinari@bhnovinari.ba, WEB: www.bhnovinari.ba

GRADSKO VIJEĆE TUZLA
ZAVNOBIH-a br. 11
75000 Tuzla
n/r Predsjedavajućeg Gradskog vijeća Tuzla
n/r Članova Kolegija Gradskog vijeća Tuzla
n/r Vijećnika Gradskog vijeća Tuzla

Datum: 08.06.2026.

Mjesto: Sarajevo

Broj protokola: 01 – 44/26

***Predmet:** Zahtjev za razrješenje Mirnesa Ajanovića sa funkcije predsjednika Komisije za ljudska prava i slobode Gradskog vijeća Tuzla*

Poštovani/a,

Udruženje/udruga BH Novinari obraća se Gradskom vijeću Tuzla sa zahtjevom za razrješenje vijećnika Mirnesa Ajanovića sa funkcije predsjednika Komisije za ljudska prava i slobode GV Tuzla zbog kontinuiranog javnog targetiranja novinara i osporavanja njihovog prava na slobodu izražavanja, vršenja pritiska na medijske radnike i profesionalno novinarsko udruženje te djelovanja koje je nespojivo sa osnovnim vrijednostima i mandatom Komisije kojom predsjedava.

Tokom proteklih sedmica gospodin Ajanović je na društvenim mrežama i kroz pisemena obraćanja domaćim i međunarodnim organizacijama i institucijama u više navrata javno targetirao i klevetao istraživačke novinare Anisu Mahmutović i Adisa Mujdanovića zbog njihovog profesionalnog rada i javnog svjedočenja pred Komisijom za borbu protiv korupcije Parlamentarne skupštine BiH 11. maja, u kojem su govorili o radu pojedinih privatnih visokoškolskih ustanova u BiH, a na osnovu saznanja do kojih su došli novinarskim istraživanjem radi pisanja i objave autorskih tekstova.

Advokat Ajanović, koji zastupa Evropski univerzitet Kallos, iznio je niz neistinitih i uvredljivih tvrdnji na račun Anise Mahmutović i Adisa Mujdanovića, nazivajući novinarku „saradnicom SDA“ i optužujući novinare za „manipulaciju javnošću“. Nakon što su BH Novinari javno stali u zaštitu prava novinara i [osudili](#) ovakve pritiske, gospodin Ajanović je nastavio sa javnim napadima na naše udruženje, a prema njegovim navodima, podnio je i krivične prijave i tužbe za klevetu protiv navedenih novinara i odgovornih osoba u Udruženju BH Novinari. Pri tome, advokat Ajanović nije, prije tužbi i javnih objava, koristio legitimna i zakonom propisana sredstva reagiranja u vezi sa

medijskim sadržajima putem demantija iznesenih navoda, već je pokrenuo javnu hajku protiv navedenih novinara i udruženja kroz objave na društvenim mrežama ili pisma organizacijama i institucijama koje se bave zaštitom slobode izražavanja i sigurnošću novinara.

Ovakvi postupci predstavljaju veoma ozbiljan oblik političkog pritiska na novinare i organizaciju koja se više od dvije decenije bavi zaštitom slobode izražavanja, medijskih sloboda i sigurnosti novinara u Bosni i Hercegovini. Smatramo da je potpuno neprihvatljivo da Komisijom za ljudska prava i slobode GV Tuzla predsjedava osoba koja javno targetira novinare, koristi svoj javni položaj za obračun sa medijskim radnicima i njihovim strukovnim udruženjem te svojim djelovanjem doprinosi stvaranju atmosfere pritiska i zastrašivanja novinara. Takvo ponašanje u direktnoj je suprotnosti sa principima slobode izražavanja, prava na informisanje, zaštite ljudskih prava, sloboda i demokratskog dijaloga koje Komisija za ljudska prava i slobode treba promovirati i štiti. Javna kampanja usmjerena protiv novinara i profesionalnog udruženja novinara, koju predvodi Ajanović, ozbiljno kompromituje kredibilitet Komisije u cjelini i dovodi u pitanje njenu sposobnost da djeluje kao nezavisno tijelo za zaštitu ljudskih prava.

Podsjećamo da je zbog ovog slučaja reagovala i Evropska federacija novinara (EFJ), [izrazivši punu solidarnost](#) sa BH Novinarima i zabrinutost zbog napada usmjerenih prema novinarima i organizacijama koje štite medijske slobode. Zbog svega navedenog, zahtijevamo od Gradskog vijeća Tuzla da:

1. Pokrene proceduru razrješenja Mirnesa Ajanovića sa funkcije predsjednika Komisije za ljudska prava i slobode Gradskog vijeća Tuzla;
2. Predmet uputi Etičkom odboru Gradskog vijeća Tuzla radi utvrđivanja eventualne odgovornosti za povredu Kodeksa ponašanja vijećnika i narušavanje ugleda Gradskog vijeća Tuzla;
3. Usvoji zaključak kojim se osuđuju svi oblici pritiska, targetiranja i zastrašivanja novinara/ki, uključujući pritiske usmjerene prema novinarima Anisi Mahmutović i Adisu Mujdanoviću, kao i Udruženju BH Novinari.

Vjerujemo da Gradsko vijeće Tuzla neće dozvoliti da Komisiju za ljudska prava i slobode vodi osoba čije je javno djelovanje u suprotnosti sa vrijednostima koje ta komisija treba predstavljati i štiti. Očekujemo da Gradsko vijeće postupi odgovorno i potvrdi svoju opredijeljenost za zaštitu slobode medija, slobode izražavanja i sigurnosti novinara kao temeljnih demokratskih vrijednosti i ljudskih prava.

S poštovanjem,

U ime Upravnog odbora Udruženja/udruge BH novinari:

B. Rudić



Borka Rudić, generalna tajnica